

# Neuzeuger Messerer - Rud

Rudenkirtag Sierning Faschingdienstag 21.2.2023



<p>d'Neuzeuger Messerer Rud sägt nuh ållweil schö' Grüaß Gott a poar san g'impft, an etla net trotzdem s'Landlatånzn geht koa oanziger is gstorbn mia san frech wia vor drei Joahrn wird doh net dö Täuscherei umasunst gwesn sei'</p>	<p>Da Hundsberger Bert folgt ganz sein' großn Vorbüld Bräuer Franz Vizebuagamoasta, dann Siern'ger Rudnobmann nächher Ehrnbürger glei nur dös oane, dös is neu s'hätt da Bräuer nia damächt ön Rudnkirta fäst umbrächt</p>
<p>Da Buagamoasta Kerbl is ganz neu kimmt va Neuzeug wia ållwei' und er zoagt am Anfang glei er håt ah a gschliffas Mäu' mit zehntausnd Einwohner vadiert er mehr der noble Herr muaß håt Náchwuchs produziern dann geht's aufwärts in Siern'g</p>	<p>Hier lebe ich, hier kaufe ich der Werbeslogan håt's in sich d'Irene Moser hält't den Spruch für neuche Gmei'debürger hoch fäst koa Gschäft mehr drinn im Ort is der Spruch fürs oane guat wer in Sierng ei'kaffa geht dem bleibt wenigstns ös Geld</p>
<p>Im Floraweg in Neuzeug drunt gehngan d'Sternsinga eah Rund da Sigi und dö Mayr Herta sågn eah Bitt' in Reimeswörter da Schwarze fehlt, dös is koa Glick s'liegt in da Gmeindepolitik schwarze gibt's já alloan in Sierng scho' weng, in Neuzeug koan</p>	<p>Da Huemer Heribert va Rohr håt oft Kreuzweh sauba gmua nimmt an Polster, schmeißt'n schnell zan Warma nei' in d'Microwelln s'Handy rutscht eahm ah dazuah an Schnälzer mächts, vabei is d'Ruah so a Kreuzweh, moant er heier tuat net nur weh, es kimmt ah teuer</p>
<p>d'Schierl Christl drunt va Lååh geht zan Zahnarzt, und danå muaß's a Wocha, net zan kenna ohne Zåhnd durch Lååh renna wia soll's denn so in d'Kircha geh Gott sei Dank is Pandemie då woaß's auf oanmål ganz gwiß für wås a Maskn guat is</p>	<p>d'Lovrec Eva, ohne Schirm geht mitn Aufpasshund spåziern steht ban Gartntürl scho doh der Hund der ziagt net a' já wo bleibt er denn der kleine er hängt goar net an da Leine huckt im Wohnzimmer nuh drinn und schaut gmüatli WM</p>
<p>Ö da kloan Speis ön großn Haus håt d'Wolfinger Judith a Maus net zan dawischn dös Luada ah mitn bestn Lockfuatta sperrt a Kåtz ins Kammerl eini dö wird's fanga gwiß und schleini doh dö tuat sih selbn vastricka bleibt am Fliagnfanggåttern picka</p>	<p>Da Söllradl Hans håt sicherlich sei' Handy gern net z'nåh bei sich vagißt's am Autodachl drobn valiert's und fahrt weit weg davon låsst's ön Wirtshaus gern liegn gibt für eahm an kloarn Sinn so bleibts nách älter Tradition a echte Fernsprecheinrichtung</p>

<p>In Poaberg dö Ausweichsträßn nennt ma Stöfflbau'nbusn ban Wegschoada hábns ah durchdächt so an Ausweichbusn g'mächt doh der Bogn der is um s'Kenna gråd amål a Eitzerl kleana hábn eppad s'Måß gnumma drinn va da Wegschoadarin</p>	<p>Mitanaund vasteh' toan si'h am bessan dö zwoa Buchegger Schwestan dö oa tuat ba dö Blumen steh dö andre nebnbei im Kaffe und dö Kundnwarteschlang beiderseits oft ganz schö lang bis zan Umfälln wartn d'Leit da Friedhof is já eh net weit</p>
<p>d'Schwamminger Volkstanzgruppn, já bewegt sih ah scho' kloa bergá' hint und vorn zwickt wo a Schmerz irwigsmål druckt oan dös Herz Kopf- und Kreuzweh, Gicht und Schwindl etla brauchan scho' a Windl mancher büld't sih goar ei' s'san állweil neuचे Leut dabei</p>	<p>Im berühmtn Rudnsåål wird's mitn Essn langsam schmål koa Wirt hát Lust, koa Caterer wüll dá ausschenka mehr miass ma uns in Zukunft denna d'Jausn selba mitnehma zan auslösn van Gstanzlwei' ládnts uns hält za euch hoam ei'</p>